

增補宋元學案

冊
六

100-100-100-100-100

100

艾軒學案表

林光朝

林亦之

陳藻

林希逸

陸子正門人
和靖震澤再

劉翼

伊川三傳
安定濂溪涼

劉夙

子彌臣

孫克莊

洪天錫

水百源四傳

邱葵
別見北溪學案

孫克遜

子彌邵

子孟渙
別見槐堂諸儒學案

劉朔

子起晦

子孟渙
別見槐堂諸儒學案

陳士楚

黃芻

林阿盥

黃叔盥

魏幾

陳俊卿

別見武夷學案

吳松年

別見周許諸儒學案

趙汝愚

別見玉山學案

陸九淵

別爲象山學案

方翥

別見震澤學案

陳昭度

黃鐘

並艾軒講友

宋元學案卷四十七

餘姚黃宗羲原本

後學慈谿馮雲濠校刊

男百家纂輯

鄞縣王梓材重校

鄞縣全祖望修定

道州何紹基重刊

艾軒學案

祖望謹案和靖高第如呂如王如祁皆無門人可見鹽官陸氏獨能傳之艾軒於是紅泉雙井之閒學派興焉然愚讀艾軒之書似兼有得於王信伯蓋陸氏亦嘗從信伯遊也且艾軒宗旨本於和靖者反少而本於信伯者反多實先槐堂之三陸而起特槐堂貶及伊川而艾軒則否故晦翁於艾軒無貶詞終宋之世艾軒之學別爲源流述艾軒學案梓材案艾軒傳錄自黃氏補本梨洲原本或有之其學派則謝山修補頗詳

子正門人尹王再傳

文節林艾軒先生光朝

林光朝字謙之莆田人自少聞吳中陸子正學於尹和靖因往從之由是專心聖賢踐履之學隆興元年年五十始進士及第調袁州司戶參軍與劉朔咸以名儒薦對論龍大淵曾覲罪改左承奉郎知永

福縣累官國子司業兼太子侍讀兼史職因不往賀樞密張說出爲
廣西提點刑獄廣東荆襄茶寇爲亂先生乃自將郡兵檄摧鋒統制
路海鈐轄黃進各以軍分控要害會徙轉運副使留屯不去督二將
遮擊之賊驚懼宵遁帝聞喜其儒生知兵加直寶謨閣召拜國子祭
酒兼太子左諭德淳熙四年除中書舍人封還曾覲所薦謝廓然內
批改工部侍郎不拜以集英殿修撰出知婺州因引疾提舉興國宮
卒年六十五諡文節學者稱艾軒先生先生學通六經貫百氏言動
必以禮四方來學者亡慮數百人然未嘗著書

雲濠案先生著有艾

軒集九卷附錄一卷

惟口授學者使之心通理解嘗曰道之本體全

於太虛六經既發明之後世注解已涉支離若復增加道愈遠矣又
曰日用是根株言語文字是注腳

梓材案艾軒家傳一卷其從子成

季所述見直齋書錄解題

說者謂南渡後倡伊洛之學於東南者自

先生始云

艾軒語

不亦說乎說不餒也時習如車輪運轉時此尙未見得如何纔頃刻
推不去便覺前者爲說之義起居語默運轉不停此爲時習纔一失
節則餒矣乃知不餒卽爲說

忠恕者謂夫子之道乃如是忠恕有足者皆可至也非是以忠恕說一貫忠恕違道不遠要當如是發語耳

有才藻之人纔有一分簡忽氣象要做甚吾夫子謂雖有周公之才之美使驕且吝卽不足觀此語久久乃如一泓秋水鬚眉自見

梓材謹案以上三條蓋皆艾軒與楊次山書中語

世閒惟有榮辱毀譽所不到者爲建德之國

附錄

公與龜山之孫楊次山書有云某幼聞李太白石曼卿之爲人卽踴躍道其事又讀晉書見一樣人物如寒蟬孤潔不入俗調心甚樂之一日對方次雲及六兄談六兄乃夾漈也古人如此終是不俗六兄云此數人來孔子之門一日著腳不定某乃悟夫子之門爲人物準的千歲人物要得入此窠樣中乃無愧千歲而上有多少豪傑可以共學入道恨不令聞此語陳寔管寧元德秀姿稟如許數百年中乃一見又卻不聞道此大可惜

答人問忠恕而已矣曰南人偏識荔枝奇滋味難言只自知剛被北人來借問香酣兩字且酬伊

自喻有曰修水佳人白玉蘭花前何似妾容顏從來未省傷春意猶

自樓頭畫遠山又曰莫怪騷人太頡頏曾聞阿母語劉郎神仙本是無言說尸解由來最下方

林竹溪膚齋學記曰詩序不出於子夏亦未必出於毛公非溪西艾軒二先生未有具此眼者補

艾軒講友

正獻陳先生俊卿

別見武夷學案

知州吳先生松年

別見周許諸儒學案

忠定趙先生汝愚

別見玉山學案

文安陸象山先生九淵

別見象山學案

正字方次雲先生翥

別見震澤學案

縣令陳西軒先生昭度

陳昭度字元矩仙遊人與林艾軒方次雲友善自號西軒子爲藤州教授以致知謹獨教學者終長樂令補

艾軒門人尹王三傳

文介林綱山先生亦之

林亦之字學可福清人一作龍江人艾軒嘗講學於莆之紅泉及卒學者請先生繼其席趙忠定帥閩嘗以先生之行業上於朝未幾卒

學者稱網山先生景定閒贈迪功郎有集雲濠案網山集非復原本
四庫書目稱掇拾叢殘姑備插架

梓材謹案閩書言先生師艾軒三十餘年爲學一本躬行能繼
其師說趙忠定帥閩辟入東井書堂又云景定閒林希逸追舉
其賢賜諡文介

著作劉先生夙

劉夙字賓之莆田人也生毀齒日讀千字嘗時時習誦其所記憶者
同門黃芻笑曰患健忘邪答曰我心樂此誦久樂益深矣偕其弟朔
受業艾軒之門以紹興二十一年進士累官温州教授永嘉人才正
盛陳止齋葉水心方爲諸生先生一見卽奇之召試館職策問薦舉
之敝對曰此執政大臣爲惠而不知爲政致之也陳執中章子厚人
知其爲小人也然能不以官私其親今將告執政曰子爲執中乎爲
子厚乎則艷然怒矣至其行事則有爲二人所不爲者時傳誦之除
正字移樞密院編修兼國史院編修乞侍養不就陳良祐周操合疏
留之除著作佐郎孝宗銳意恢復內廷設射馳球大雨水蝗害稼而
曾覲龍大淵挾聲勢陰進退士大夫皆相顧莫敢言言輒逐隆興二
年七月先生輪對奏曰羣臣不以堯舜事陛下臣不識忌諱竊深憤

之上曰天下事可言者第言勿隱對曰自去夏至今日再食東南三地震比又積陰彌月所至水潦蝗食雨中爲異尤大在廷謂陛下宜避殿損膳自責矣而至今不聞德音左右近習盜陛下權且長淮無一兵之戍而陛下乃親技擊騁銜轡豈緩急欲爲自將地乎閣德陳敏近墮馬失臂梁珂亦摧折瀕死陛下所親見也上爲改容遂下詔曰政事不修災異數見江浙水潦害於秋成朕甚懼焉其自八月朔不御正殿減常膳令侍從至館職疏朕闕失及當今急務先生又上封事曰陛下引舊寮謀政事得如張闡王十朋可也乃與覲大淵輩觴詠唱酬字而不名罷宰相易大將待其言而後決嚴法守裁徼倖自宮掖近侍始可也梁珂一年三受醴賞他內目一日遷四使而但減卿監郎曹數十員昔姚崇以十事要其君曰能用則就不用則去今陛下以五事要其臣曰不能如是則去能如是則留然則安用大臣孔道輔首論曹利用羅崇勳使罷去呂誨范純仁力諫濮王不可稱親今么麼如楊俛輩尙熟視不敢議然則安用臺諫又言國初僭叛雖平人情未一故設邏卒今徒用之以監謗豈可不畏又曰禹惡旨酒湯不邇聲色夫宴遊無度甚則有流蕩戲狎之患御幸無節其終爲人獸雜亂之禍願陛下罷行前事應天以實庶可消弭災變疏

入亟求罷留之數日不可以爲湖北安撫參議不行乾道元年奉祠三年覲大淵出起先生知衢州復奏君子小人之辨曰人主不示天下以所好而常禁其所偏上然之在州期年政平訟簡州人繪像祠之曾覲副賀金正旦使道衢入謁先生不內移知温州會旱全家淡食請命雖奉母亦以素饌已而以病奉祠州人爲之出涕其歸也莆亦大旱手條掇荒十餘事行之得以不饑孝宗之志恢復也士無不以此說進雖朱子亦言之嘗遇先生於李侍郎浩座上先生弗是也侍郎亦如先生意他日朱子謂人曰吾乃爲賓之德遠夾攻南軒張子尤重先生曰王龜齡弗逮也先生兄弟並以名德重於朝顧皆不得大用乾道六年其弟卒年四十四先生以次年亦卒年四十八四方悲之如親戚艾軒皆爲位而哭周益公因率諸朝士哭之於其邸艾軒曰吾爲國受弔也又曰賓之愛君均於愛親憂國過於憂身古有遺直今難其所著有春秋解

附錄

乾道五年曾覲召歸過衢州守臣劉賓之諭以入城決不相見覲乃取道城外

真西山序春秋講義曰昌黎公寄玉川子詩有春秋三傳束高閣之

語學者疑之謂未有舍傳而可求經者今觀著作劉公講義一以聖筆爲據依其論秦穆公以人從死者晉文之召王宋襄之用人於社皆以經證傳之失所謂偉然者也昔歐陽子患僞說之亂經著爲論辯自謂時雖莫同千歲之後必有予同曾未二百年而劉公之論春秋蓋與之合公而有知當不恨後世之無子雲矣所講纔十有二條麟經大旨略盡於此其言曰吾聞法吏以一字輕重矣未聞聖人以一字輕重春秋也旨哉言乎足以破世儒之陋學者其深味之

正字劉先生朔

劉朔字復之

雲濠案先生名一作翔歿閩書翔字圖南福州水口人

紹興十五年進易解者別一人

著作第也天下稱爲二劉以紹興三

十年進士爲温州司戶少治易其兄謂曰春秋爲王氏茅塞久矣由是更治春秋名其家温州大饑繼以大疫先生計口受祿以其餘散糜粥日有常數同僚以及富人爭效之親爲病者切脈施藥晨往晏罷徑入徐出或謂之曰將毋爲堂上憂曰此吾老母意也所全活數萬人聚道旁棄兒常百計募乳媼飼之聽無子者擇取比滿秩災疫尙未盡消民泣曰司戶去吾儕且死先是著作以先生迎養於溫故亦求其教授於溫既召試先生攝學事永嘉學術之盛兄弟皆與有

力焉召對奏曰陛下何不延納憤激敢言之士而聽訐直難堪之言因以自考成敗得失因言曾覲龍大淵罪狀以是不得留先生乞奉嶽祠孝宗念之猶得知福清縣福之支邑月責羨錢而無經賦先生盡罷之復請緩輸數月大帥感其言爲并旁縣俱寬之聽訟使兩辭自詣無追呼者市食挂錢於門民當其物持錢而去縣庭常空不復知械索所在王參政之望爲帥自尊僚屬卑屈甚先生以友誼責之之望不悅也於是復請祠歸再召對虞允文贊恢復銳甚希進者趨和之先生諫曰臣觀今日通和未爲失策昔富弼累增歲幣今減十萬矣往時兩淮不許備守今江北諸城增陴浚隍矣前此江上教兵彼輒呵問今沿淮分屯鼓聲達泗潁矣敵或示我弱殆不可測宜選兵將廣儲峙責成於端重堪事者從容以待其變若募彼人嚮導挾異國濟師合中原響赴而兵不必衆就敵人儲聚而粟不必多憑虛蹈空過爲指料將有臨危失據之憂此所謂決天下於一擲者也上竦然除正字時朝列之以持重觀釁爲詞者惟先生兄弟旣而允文卒無功先生又言歸附人宜散處州縣不當聚畿甸從之以疾求福建參議行至信安卒自先生去溫其兄復守溫惠政相埒溫人念念不置每見莆人輒問二劉公安否聞其相繼卒也哭之失聲先生與

其兄齊名著作挺特不肯輕以聲色假人先生稍濟以和易至於輕祿位而重出處厚名分而薄勢利盡言於朝盡心於官公是非勵廉隅則所同也嘗謂朋友講習爲古今至樂又曰天下至大也千歲至遠也所不可一日無者公論也朋友羣居敬畏之心所由生而公論之所由出也窮山永夕篝燈共語嘗聞鐘聲未已其卒也家無留貲所著有春秋紀年圖著作三子其著者曰彌正彌邵正字三子其著者曰起晦修

附錄

林謙之劉復之以名儒薦對及曾龍罪惡皆補縣自是無敢言者

侍講陳先生士楚

陳士楚字英仲莆田人早從林艾軒遊乾道中登第淳熙末召爲國子監簿光宗立除司封郎兼嘉王府直講遷軍器少監出使江東寧宗朝歷起居舍人明年除侍講嘗講周書無逸篇喻小人在朝君子在野之意上嘉納之未幾卒補

縣丞黃先生芻

黃芻字季野艾軒門人志行高古同遊士自劉夙劉朔林亦之而下皆推讓焉一第而天竟止懷安縣丞修

林先生阿盥

陳先生叔盥合傳

林阿盥字載德福清人與同邑陳叔盥並遊艾軒之門閩人謂之二
盥阿盥問六經根源無所入而欲投江艾軒稱之爲漁鹽中膠鬲叔
盥少從於紅泉出揖客面容頽然艾軒曰心不負人面無頽容叔盥
悟而自力遂以行義名參福清儒林傳

魏先生幾

魏幾字天隨福清人受學艾軒以克己復禮問答曰五湖明月因以
穎悟賦丹霞夾明月有半白在梨花之句人以半白梨花郎目之同上

西軒門人

縣尉黃定齋先生鐘

黃鐘雲濠案鐘一作鍾字器之興化人號定齋從陳昭度遊乾道中

登第待次德化尉講學授徒里人服其教調漳州錄事參軍先生喜
著述有周禮集解荀楊續註杜詩註釋史要諸書補
網山門人尹王四傳

文遠陳樂軒先生藻

陳藻字元潔號樂軒居福清之橫塘初網山師艾軒網山之徒又推樂軒爲高第開門授徒不足自給至浮游江湖崎嶇嶺海歸買田數畝輒爲人奪去士之窮無過於此矣而以樂軒自扁此固先生所聞於師者與著有論語解

雲濠案先生尙有樂軒集八卷論語解佚

梓材謹案福州府志言先生家貧篤學不求人知課妻子耕織

務本師林網山得艾軒經學之傳一時學者多從之遊旣卒門

人林希逸請于朝贈迪功郎謚文遠

附錄

後村劉氏作三先生祠堂有曰里中前一輩及艾軒之門者衆矣然數十年更相推讓卒以傍邑二士接艾軒之傳所謂公論在人心者邪

雲濠謹案三先生謂艾軒網山樂軒也

林竹溪屬齋學記曰退之送文暢序先師樂軒云退之只是說得亦未必盡知之補

又曰虞翻以坤艮爲虎馬融以兌爲虎郭璞以兌艮爲虎坤爲虎坤交乾也艮爲虎寅位也天文尾爲虎艮也兌爲虎參伐之次也龍德所衝爲虎亦兌也易之取象果如是乎獨樂軒以理言象八卦之外

不喜穿鑿曰乾爲馬坤爲牛而牝馬地類坤象辭也論易象者當以爲法補

又序樂軒詩筌曰在昔隆乾閒士之師道立浙有東萊呂氏建有晦庵朱氏湘有南軒張氏江西有象山陸氏莆有艾軒林氏皆以道師授並世而立名者也艾軒於時猶爲前輩號南夫子獨不喜著書門人又益微黃懷安芻最高第最先天二劉著作正字雖暫顯亦蚤卒世其學者網山一人再傳樂軒又皆以布衣死艾軒在網山以艾軒名網山在樂軒以網山名近二十年鄉井聞見日陋張呂諸儒以其書在可磔裂欺世故人能言之言象山者疑信已半至若艾軒姓氏則問之晚少年漫不省樂軒雖得壽後網山死四十年衰白窮槁人以爲常人矣且面背譏笑不小其文旣不適時閒出語又驚世駭俗至於今譏笑未已也樂軒卒十年予請於宗伯而祠之或詈或排幾不就役昨之日猶有難予者曰子之師何如人也笑而應之曰人矣乎烏乎長曰奚短哉烏乎學曰奚道哉以文名乎曰玉質金相春明秋潔絕出羣言探入微蹟先生之文若是已名則吾不知以詩名乎曰洗削穠華完復素樸羣詒鄙里自謂奇崛先生之詩若是已名則吾不知然則至道矣乎曰玩神遺形甘約保獨傲晚乎鬼神兄老而